

## 【地盤佬 Upgrade】叫我鋼筋屈紮師 整理 app 搵工更易

話說現在香港有 45 萬註冊建造業技術工人，95 個不同工種。以現在 735 萬人口計，即每 16 個香港人就有一個是地盤中人了。然而當中約有 46% 工人已超過 50 歲，正陸續退休。所以，建造業近年努力宣傳，又辦好多比賽活動，如已經第五屆的建造業運動會，下個月又有首屆建造業機械操作比賽，令個行業感覺活潑些，新潮些，招兵買馬吸納新血。

但只搞活動，成日訪問大專畢業生做地盤，事事向好，邊夠？市民仍然戴着有色眼鏡，覺得他們污穢、粗魯；同搭一部電梯會閃開；開工不足，日薪高都係冇前途，始終令人卻步，或者搵一陣錢就走。這個行業又好倚賴人脈，散工制日薪高些，但地盤間各自找蛇頭找工人，你識得人越多，才搵到工做。有些地盤開工不足，有些地盤又找不到工人，分配好不平均，收入不穩，年輕人就算頂得住辛苦，都頂不住吊鹽水。而且，四十年來從未化，為此，香港鋼筋屈紮業工商聯會副會長梁曙光正着手，想更新這個行業給人的印像，首先他要整個 app：「類似叫 call 車七七的，誰想找工作，誰想找工人就登記，就立即可交收了，解決搵工同人手分配不均的問題。」

另外，還計劃申請改返個專業啲型啲嘅名，「唔好再叫我紮鐵佬，叫我鋼筋屈紮技術員，再做落去鋼筋屈紮師不好嗎？」讀完 97 日先招聘後培訓速成班中工畢業，起薪點日薪一千元左右，做兩三年日薪千四五，層層而上，「名就當然不重要啦，但畀他們知道不會一世做紮鐵，但可以一直升上去到管工，就看到前景。」

有紮鐵公司特意寫網頁、整 apps 拍片吸引觀眾，不便出鏡的騰建資訊網小編說，現在不上網簡直同社會脫節，上年紀的技工搵人人搭人，根本就搵唔到人。點做呢？專頁裏面沒有一味唱好，反而會搵工友做搞鬼訪問，訪問大陸朱，鬧爆開工不足苦況；任工友討論「地盤最恐怖的考驗，係臭到 HiHi 的廁所」；討論吓用「燒你數簿」、「請你好好放低」代替魚蝦蟹問候同業；又關心吓孤苦無依的地盤狗的故事，領養代替購買，毫不避諱，都係想大家好好了解地盤工作苦樂的一面，「即是好過盲目吹捧，地盤佬好偉大甚麼甚麼的。我想真相會比站在任何一邊更好。」

記者：陳慧敏

攝影：潘志恆



唔叫紮鐵佬，叫鋼筋屈紮師聽落自欺欺人。然而只是想整理個升級標準，讓入行的人看到升級階梯，減少「睇唔到未來」的不安全感。



原來屈鐵用的機器，幾乎四十年沒變過，近年興起在偏遠地方先屈好鐵開料，再送到地盤使用，已算是一項進步。



香港鋼筋屈紮業工商聯會副會長梁曙光想籌備弄一個互聯的搵工 app，哪間公司或地盤要人一目了然，還可即時配對聯系，減省昔日要識人才搵到工的苦惱。